

# 藥師琉璃光如來 本願功德經

大唐三藏法師玄奘奉詔 譯



南無本師釋迦牟尼佛


## 說明

本繁體校正本《藥師琉璃光如來本願功德經》電子書，根據《高麗大藏經》大乘經五大部外諸重譯經，第 0177 部，大唐三藏法師玄奘奉詔譯《藥師琉璃光如來本願功德經》原藏影印本校正。句讀僅供參考。

本電子書是免費結緣品。特此說明。

仁慧草堂

二〇一九年十月



扫码关注仁慧草堂微信公众号

## ●起誦儀

### 香讚

(一編)

爐香乍爇。法界蒙薰。諸佛海會悉遙聞。隨處結祥雲。誠意方殷。諸佛現全身。

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 淨身業真言

(三編)

唵.修哆唎.修哆唎.修摩唎.修摩唎.薩婆訶.

### 淨口業真言

(三編)

唵.修唎修唎.摩訶修唎.修修唎.薩婆訶.

### 淨意業真言

(三編)

唵.鞞日囉怛訶賀斛.

## 淨三業真言

(三編)

唵.娑嚩.婆嚩秫馱.娑嚩達摩娑嚩.婆嚩秫度憾.

## 安土地真言

(三編)

南無三滿哆.母馱喃.唵.度嚕度嚕.地尾.娑婆訶.

## 普供養真言

(三編)

唵.誡誡曩.三婆嚩.鞞日囉斛.

## 發願文

(一編)

稽首三界尊	皈命十方佛
我今發宏願	持此藥師經
上報四重恩	下濟三塗苦
若有見聞者	悉發菩提心
盡此一報身	同生瑠璃國
親覲大慈父	殷勤聞真諦
學習獅子吼	回返娑婆地
度眾脫苦海	弘法利群迷

## 奉請十二藥叉大將

(一編)

奉請	宮毗羅大將	奉請	伐折羅大將
奉請	迷企羅大將	奉請	安底羅大將
奉請	頰你羅大將	奉請	珊底羅大將
奉請	因達羅大將	奉請	波夷羅大將
奉請	摩虎羅大將	奉請	眞達羅大將
奉請	招杜羅大將	奉請	毗羯羅大將

## 藥師讚

(一編)

十二大願，饒益有情，密咒加持德難名，禮  
念願圓成，怨業冰清，壽永福慧宏。

南無藥師琉璃光如來 (合掌三稱)

南無藥師會上佛菩薩 (合掌三稱)

## 開經偈

(一編)

無上甚深微妙法 我今見聞得受持  
百千萬劫難遭遇 願解如來真實義

# 藥師琉璃光如來本願功德經

大唐<sup>1</sup>三藏法師玄奘奉 詔譯

如是我聞：

一時，薄伽梵遊化諸國，至廣嚴城，住樂音樹下，與大苾芻眾八千人俱，菩薩摩訶薩三萬六千，及國王、大臣、婆羅門、居士、天、龍、藥叉、人、非人等無量大眾，恭敬圍繞，而為說法。

尔時，鼻殊室利法王子承佛威神，從座而起，偏袒一肩，右膝著地，向薄伽梵曲躬合掌，白言：「世尊！惟願演說如是相類諸佛名号及本大願殊勝功德，令諸聞者，業障消除，為欲利樂像法轉時諸有情故。」

尔時，世尊讚鼻殊室利童子言：「善哉！善哉！鼻殊室利，汝以大悲勸請我說諸佛名号、本願功德，為拔業障所纏有情，利益安樂像法轉時諸有情故。汝今諦聽，極善思惟，當為汝說。」

鼻殊室利言：「唯然！願說，我等樂聞。」

佛告鼻殊室利：「東方去此過十殑伽沙等佛土，有世界名淨琉璃，佛号藥師琉璃光如來、應、

<sup>1</sup> 麗藏：大唐；永樂北藏及龍藏：唐

正等覺、明行圓滿、善逝、世閒解、无上丈夫<sup>2</sup>、調御士<sup>3</sup>、天人師、佛、薄伽梵。曩殊室利，彼佛<sup>4</sup>世尊藥師琉璃光如來本行菩薩道時，發十二大願，令諸有情，所求皆得。

「第一大願：願我來世，得阿耨多羅三藐三菩提時，自身光明熾然，照曜无量、無數、无边世界，以三十二大丈夫相、八十隨好莊嚴其身，令一切有情如我無異。

「第二大願：願我來世，得菩提時，身如琉璃，內外明徹，淨无瑕穢，光明廣大，功德巍巍，身善安住，焰網莊嚴，過於日月；幽冥眾生，悉蒙開曉，隨意所趣，作諸事業。

「第三大願：願我來世，得菩提時，以無量无边智慧方便，令諸有情皆得无盡所受用物，莫令眾生有所乏少。

「第四大願：願我來世，得菩提時，若諸有情行邪道者，悉令安住菩提道中；若行聲聞、獨覺乘者，皆以大乘而安立之。

「第五大願：願我來世，得菩提時，若有無量无边有情，於我法中，修行梵行，一切皆令得

<sup>2</sup> 麗藏：丈夫；永樂北藏及龍藏：士

<sup>3</sup> 麗藏：士；永樂北藏及龍藏：丈夫

<sup>4</sup> 麗藏：彼佛；永樂北藏及龍藏：彼

不缺戒，具三聚戒。設有毀犯，聞我名已，還得清淨，不墮惡趣。

「第六大願：願我來世，得菩提時，若諸有情，其身下劣，諸根不具，醜陋頑愚，盲聾瘖瘂，攣臂背僂，白癩癲狂，種種病苦，聞我名已，一切皆得端正黠慧，諸根完具，无諸疾苦。

「第七大願：願我來世，得菩提時，若諸有情，眾病逼切，無救無歸，无醫无藥，無親无家，貧窮多苦，我之名号，一經其耳，病悉得<sup>5</sup>除，身心安樂，家屬資具，悉皆豐足，乃至證得无上菩提。

「第八大願：願我來世，得菩提時，若有女人，為女百惡之所逼惱，極生厭離，願捨女身，聞我名已，一切皆得轉女成男，具丈夫相，乃至證得無上菩提。

「第九大願：願我來世，得菩提時，令諸有情，出魔羅網，解脫一切外道纏縛；若墮種種惡見稠林，皆當引攝置於正見，漸令修習諸菩薩行，速證無上正等菩提。

「第十大願：願我來世，得菩提時，若諸有

<sup>5</sup> 麗藏：病悉得；永樂北藏及龍藏：眾病悉

情，王法所錄，縲<sup>6</sup>縛鞭撻，繫閉牢獄，或當刑戮，及餘無量災難凌辱，悲愁煎迫，身心受苦；若聞我名，以我福德威神力故，皆得解脫一切憂苦。

「第十一大願：願我來世，得菩提時，若諸有情，飢渴所惱，為求食故，造諸惡業，得聞我名，專念受持，我當先以上妙飲食，飽足其身，後以法味，畢竟安樂而建立之。

「第十二大願：願我來世，得菩提時，若諸有情，貧無衣服，蚊蚋、寒熱晝夜逼惱；若聞我名，專念受持，如其所好，即得種種上妙衣服，亦得一切寶莊嚴具，花鬘塗香，鼓樂眾伎，隨心所翫，皆令滿足。

「鼻殊室利，是為彼世尊藥師琉璃光如來、應、正等覺，行菩薩道時，所發十二微妙上願。

「復次，鼻殊室利，彼世尊藥師琉璃光如來行菩薩道時，所發大願及彼佛土功德莊嚴，我若一劫，若一劫餘，說不能盡。然彼佛土，一向清淨，無有女人，亦無惡趣及苦音聲，琉璃為地，金繩界道，城闕、宮閣、軒窓、羅網皆七寶成，亦如西方極樂世界功德莊嚴，等無差別。於其國

<sup>6</sup> 麗藏：縲；永樂北藏及龍藏：繩

中，有二菩薩摩訶薩，一名日光遍照，二名月光遍照，是彼無量無數菩薩眾之上首，悉能持彼世尊藥師琉璃光如來正法寶藏。是故，鼻殊室利，諸有信心善男子、善女人等，應當願生彼佛世界。」

尔時，世尊復告鼻殊室利童子言：「鼻殊室利，有諸眾生，不識善惡，唯懷貪悞<sup>7</sup>，不知布施及施果報，愚癡无智，闕於信根，多聚財寶，勤加守護，見乞者來，其心不喜，設不獲已而行施時，如割身肉，深生痛惜。復有無量慳貪有情，積集資財，於其自身尚不受用，何況能與父母、妻子、奴婢、作使及來乞者？彼諸有情，從此命終，生餓鬼界，或傍<sup>8</sup>生趣，由昔人間，曾得暫聞藥師琉璃光如來名故，今<sup>9</sup>在惡趣，暫得憶念彼如來名，即於念時，從彼處沒，還生人中，得宿命念，畏惡趣苦，不樂欲樂，好行惠施，讚歎施者，一切所有悉無貪惜，漸次尚能以頭目手足、血肉身分施來求者，況餘財物！

「復次，鼻殊室利，若諸有情，雖於如來受諸學處而破尸羅；有雖不破尸羅而破軌則；有於尸羅、軌則雖得不壞，然毀正見；有雖不毀正見

<sup>7</sup> 麗藏：悞；永樂北藏及龍藏：悞；悞同悞

<sup>8</sup> 麗藏：傍；永樂北藏及龍藏：旁

<sup>9</sup> 麗藏：念；永樂北藏及龍藏：今；校勘：今

而棄多聞，於佛所說契經深義不能解了；有雖多聞而增<sup>10</sup>上慢，由增上慢覆蔽心故，自是非他，嫌謗正法，為魔伴黨。如是愚人，自行邪見，復令無量俱胷有情，墮大險坑，此諸有情，應於地獄、傍<sup>11</sup>生、鬼趣，流轉無窮。若得聞此藥師琉璃光如來名号，便捨惡行，修諸善法，不墮惡趣。設有不能捨諸惡行修行善法墮惡趣者，以彼如來本願威力，令其現前，暫聞名号，從彼命終，還生人趣，得正見精進，善調意樂，便能捨家，趣於非家，如來法中，受持學處，无有毀犯，正見多聞，解甚深義，離增上慢，不謗正法，不為魔伴<sup>12</sup>，漸次修行諸菩薩行，速得圓滿。

「復次，鼻殊室利，若諸有情，慳貪嫉妬，自讚毀他，當墮三惡趣中，无量千歲受諸劇苦；受劇苦已，從彼命終，來生人間，作牛馬駝驢，恒被鞭撻，飢渴逼惱，又常負重，隨路而行；或得為人，生居下賤，作人奴婢，受他駟役，恒不自在。若昔人中曾聞世尊藥師琉璃光如來名号，由此善因，今復憶念，至心歸依，以佛神力，眾苦解脫，諸根聰利，智慧多聞，恒求勝法，常遇

<sup>10</sup> 麗藏：增；永樂北藏：憎；龍藏：增

<sup>11</sup> 麗藏：傍；永樂北藏及龍藏：旁

<sup>12</sup> 麗藏：伴；永樂北藏及龍藏：伴黨

善友，永斷魔羅，破无明殼，竭煩惱河，解脫一切生、老、病、死，憂悲、苦惱。

「復次，鼻殊室利，若諸有情，好憊乖離，更相鬪訟，惱亂自他，以身、語、意造作增長種種惡業，展轉常為不饒益事，互相謀害，告召山林、樹塚等神，殺諸眾生，取其血肉，祭祀藥叉、羅刹娑<sup>13</sup>等，書怨人名，作其形像，以惡呪術而呪詛<sup>14</sup>之，厭媚、蠱道、呪起屍鬼，令斷彼命及壞其身。是諸有情，若得聞此藥師琉璃光如來名号，彼諸惡事，悉不能害。一切展轉皆起慈心，利益安樂，無損惱意及嫌恨心，各各歡悅，於自所受生於喜足，不相侵凌，互為饒益。

「復次，鼻殊室利，若有四眾苾芻、苾芻尼、鄔波索迦、鄔波斯迦及餘淨信善男子、善女人等，有能受持八分齋戒，或經<sup>15</sup>一年，或復三月，受持學處，以此善根，願生西方極樂世界无量壽佛所聽聞正法而未定者，若聞世尊藥師琉璃光如來名号，臨命終時，有八菩薩，乘神通來，示其道路，即於彼界種種雜色眾寶花中自然化生；或有因此生於天上，雖生天中，而本善根亦未窮盡，

<sup>13</sup> 麗藏：娑；永樂北藏及龍藏：婆

<sup>14</sup> 麗藏：詛；永樂北藏及龍藏：咀

<sup>15</sup> 麗藏：或經；永樂北藏及龍藏：經

不復更生諸餘惡趣。天上壽盡，還生人間，或為輪王，統攝四洲，威德自在，安立無量百千有情於十善道；或生刹帝利、婆羅門、居士大家，多饒財寶，倉庫盈溢，形相端嚴，眷屬具足，聰明智慧，勇健威猛，如大力士。若是女人，得聞世尊藥師如來名号，至心受持，於後不復更受女身。」

尔時，鼻殊室利童子白佛言：「世尊！我當誓於像法轉時，以種種方便，令諸淨信善男子、善女人等，得聞世尊藥師琉璃光如來名号，乃至睡中亦以佛名覺悟其耳。世尊！若於此經受持讀誦，或復為他演說開示，若自書，若教人書，恭敬尊重，以種種花香、塗香、**栴**<sup>16</sup>香、燒香、花鬘、瓔珞、幡蓋、伎樂，而為供養，以五色綵作囊盛之，掃灑淨處，敷設高座而用安處。尔時，四大天王與其眷屬及餘無量百千天眾，皆詣其所，供養守護。世尊！若此經寶流行之處，有能受持，以彼世尊藥師琉璃光如來本願功德及聞名号，當知是處無復橫死，亦復不為諸惡鬼神奪其精氣，設已奪者，還得如故，身心安樂。」

佛告鼻殊室利：「如是！如是！如汝所說。鼻殊室利，若有淨信善男子、善女人等，欲供養

<sup>16</sup> 麗藏：栴；永樂北藏及龍藏：末；栴同末

彼世尊藥師琉璃光如來者，應先造立彼佛形像，敷清淨座而安處之；散種種花，燒種種香，以種種幢幡莊嚴其處；七日七夜，受持<sup>17</sup>八分齋戒，食清淨食，澡浴香潔，著新淨衣，應生无垢濁心，无怒害心，於一切有情，起利益安樂、慈悲喜捨、平等之心，鼓樂歌讚，右遶佛像。復應念彼如來本願功德，讀<sup>18</sup>誦此經，思惟其義，演說開示。隨所樂願，一切皆遂：求長壽得長壽，求富饒得富饒，求官位得官位，求男女得男女。若復有人，忽得惡夢，見諸惡相，或恠鳥來集，或於住處百恠出現，此人若以眾妙資具，恭敬供養彼世尊藥師琉璃光如來者，惡夢、惡相、諸不吉祥皆悉隱沒，不能為患。或有水火、刀毒、懸嶮<sup>19</sup>、惡象、師<sup>20</sup>子、馬狼、熊羆、毒虵、惡蠍、蜈蚣、蚰蜒、蚊蚋等怖，若能至心憶念彼佛，恭敬供養，一切怖畏皆得解脫。若他國侵擾，盜賊反亂，憶念恭敬彼如來者，亦皆解脫。

「復次，曇殊室利，若有淨信善男子、善女人等，乃至盡形不事餘天，惟當一心歸佛、法、僧，受持禁戒，若五戒、十戒、菩薩四百戒、苾

<sup>17</sup> 麗藏：受持；永樂北藏及龍藏：受

<sup>18</sup> 麗藏：讀；永樂北藏及龍藏：讚

<sup>19</sup> 麗藏：嶮；永樂北藏及龍藏：險；嶮同險

<sup>20</sup> 麗藏：師；永樂北藏及龍藏：獅

芻二百五十戒、苾芻尼五百戒，於所受中，或有毀犯，怖墮惡趣，若能專念彼佛名号，恭敬供養者，必定不受三惡趣生。或有女人，臨當產時，受於極苦；若能至心稱名禮讚、恭敬供養彼如來者，眾苦皆除，所生之子，身分具足，形色端正，見者歡喜，利根聰明，安隱少病，无有非人奪其精氣。」

尔時，世尊告阿難言：「如我稱揚彼佛世尊藥師琉璃光如來所有功德，此是諸佛甚深行處，難可解了，汝為信不？」

阿難白言：「大德世尊！我於如來所說契經，不生疑惑，所以者何？一切如來身、語、意業无不清淨！世尊！此日月輪可令墮落，妙高山王可使傾動，諸佛所言无有異也。世尊！有諸眾生，信根不具，聞說諸佛甚深行處，作是思惟：『云何但念藥師琉璃光如來一佛名号，便獲尔所功德勝利？』由此不信，反<sup>21</sup>生誹謗，彼於長夜，失大利樂，墮諸惡趣，流轉无窮。」

佛告阿難：「是諸有情，若聞世尊藥師琉璃光如來名号，至心受持，不生疑惑，墮惡趣者，無有是處。阿難，此是諸佛甚深所行，難可信解，

<sup>21</sup> 麗藏：反；永樂北藏及龍藏：返；反同返

汝今能受，當知皆是如來威力。阿難，一切聲聞、獨覺及未登地諸菩薩等，皆悉不能如實信解，**唯**<sup>22</sup>除一生所繫菩薩。阿難，人身難得，於三寶中信敬尊重亦難可得，得聞世尊藥師琉璃光如來名号復難於是。阿難，彼藥師琉璃光如來无量菩薩行，無量善巧方便，无量廣大願，我若一劫、若一劫餘而廣說者，劫可速盡，彼佛行願、善巧方便無有盡也。」

尔時，眾中有一菩薩摩訶薩，名曰救脫，即從座起，偏袒**右**<sup>23</sup>肩，右膝著地，曲躬合掌而白佛言：「大德世尊！像法轉時，有諸眾生為種種患之所困厄，長病羸瘦，不能飲食，喉脣乾燥，見諸方暗，死相現前；父母、親屬、朋友、知識啼泣圍遶；然彼自身，臥在本處，見琰魔法王引其神識至于琰魔法王之前；然諸有情，有俱生神，隨其所作，若罪若福，皆具書之，盡持授與琰魔法王；尔時，彼王推問其人，筭計所作，隨其罪福而處斷之。時，彼病人親屬、知識，若能為彼歸依世尊藥師琉璃光如來，請諸眾僧，轉讀此經，然七層之燈，懸五色續命神幡，或有是處，彼識

<sup>22</sup> 麗藏：唯；永樂北藏及龍藏：惟；唯同惟

<sup>23</sup> 麗藏：右；永樂北藏及龍藏：一

得還，如在夢中，明了自見。或經七日，或二十一日，或三十五日，或四十九日，彼識還時，如從夢覺，皆自憶知善、不善業所得果報，由自證見業果報故，乃至命難亦不造作諸惡之業。是故，淨信善男子、善女人等，皆應受持藥師琉璃光如來名号，隨力所能，恭敬供養。」

尔時，阿難問救脫菩薩曰：「善男子，應云何恭敬供養彼世尊藥師琉璃光如來？續命幡燈復云何造？」

救脫菩薩言：「大德！若有病人欲脫病苦，當為其人七日七夜受持八分齋戒；應以飲食及餘資具隨力所辦，供養苾芻僧；晝夜六時，禮拜、供養彼世尊藥師琉璃光如來；讀誦此經四十九遍；然四十九燈；造彼如來形像七軀，一一像前各置七燈，一一燈量大如車輪，乃至四十九日，光明不絕；造五色綵幡長四十九搩手，應放雜類眾生至四十九；可得過度危厄之難，不為諸橫惡鬼所持。

「復次，阿難，若刹帝利、灌頂王等灾難起時，所謂人眾疾疫難、他國侵逼難、自界叛逆難、星宿變恠難、日月薄蝕難、非時風雨難、過時不雨難。彼刹帝利、灌頂王等，尔時應於一切有情

起慈悲心，赦諸繫閑，依前所說供養之法，供養彼世尊藥師琉璃光如來。由此善根及彼如來本願力故，令其國界即得安隱，風雨順時，穀稼成熟，一切有情无病歡樂；於其國中，无有暴虐<sup>24</sup>藥叉等神惱有情者，一切惡相皆即隱沒；而刹帝利、灌頂王等，壽命色力，無病自在，皆得增益。阿難，若帝后妃主、儲君王子、大臣輔相、中宮采<sup>25</sup>女、百官黎庶為病所苦及餘厄難，亦應造立五色神幡，然燈續明，放諸生命，散雜色花，燒眾名香，病得除愈，眾難解脫。」

尔時，阿難問救脫菩薩言：「善男子，云何已盡之命而可增益？」

救脫菩薩言：「大德！汝豈不聞如來說有九橫死耶？是故勸造續命幡燈，修諸福德，以修福故，盡其壽命，不經苦患。」

阿難問言：「九橫云何？」

救脫菩薩言：「有<sup>26</sup>諸有情，得病雖輕，然无醫藥及看病者，設復遇醫，授以非藥，實不應死而便橫死；又信世間邪魔、外道、妖孽<sup>27</sup>之師，妄說禍福，便生恐動，心不自正，卜問覓禍，煞

<sup>24</sup> 麗藏：虐；永樂北藏及龍藏：惡

<sup>25</sup> 麗藏：采；永樂北藏及龍藏：姝

<sup>26</sup> 麗藏：有；永樂北藏及龍藏：若

<sup>27</sup> 麗藏：孽；永樂北藏及龍藏：孽；孽同孽

種種眾生，解奏神明，呼諸魍魎，請乞福祐，欲冀延年，終不能得，愚癡迷惑，信邪倒見，遂令橫死，入於地獄，无有出期，是名初橫。二者，橫被王法之所誅戮。三者，畋獵嬉戲，耽淫嗜酒，放逸无度，橫為非人奪其精氣。四者，橫為火焚。五者，橫為水溺。六者，橫為種種惡獸所噉。七者，橫墮山崖。八者，橫為毒藥、厭禱、呪詛<sup>28</sup>、起屍鬼等之所中害。九者，飢渴所困，不得飲食而便橫死。是為如來略說橫死有此九種，其餘復有无量諸橫，難可具說。復次，阿難，彼琰魔王主領世間名籍之記，若諸有情不孝五逆，破辱三寶，壞君臣法，毀於信戒，琰魔法王隨罪輕重考而罰之。是故，我今勸諸有情，然燈造幡，放生修福，令度苦厄，不遭眾難。」

尔時，眾中有十二藥叉大將，俱在會坐，所謂：

宮毗羅大將	伐折羅大將
迷企羅大將	安底羅大將
頹你羅大將	珊底羅大將
因達羅大將	波夷羅大將
摩虎羅大將	真達羅大將

<sup>28</sup> 麗藏：詛；永樂北藏及龍藏：咀

## 招杜羅大將 毗羯羅大將

此十二藥叉大將，一一各有七千藥叉以為眷屬，同時舉聲白佛言：「世尊！我等今者，蒙佛威力，得聞世尊藥師琉璃光如來名号，不復更有惡趣之怖。我等相率，皆同一心，乃至盡形歸佛、法、僧，誓當荷負一切有情，為作義利，饒益安樂。隨於何等村城、國邑、空閑林中，若有流布此經，或復受持藥師琉璃光如來名号恭敬供養者，我等眷屬衛護是人，皆使解脫一切苦難，諸有願求悉令滿足。或有疾厄求度脫者，亦應讀誦此經，以五色縷結我名字，得如願已然後解結。」

尔時，世尊讚諸藥叉大將言：「善哉！善哉！大藥叉將，汝等念報世尊藥師琉璃光如來恩德者，常應如是利益安樂一切有情。」

尔時，阿難白佛言：「世尊！當何名此法門？我等云何奉持？」

佛告阿難：「此法門名說藥師琉璃光如來本願功德，亦名說十二神將饒益有情結願神呪，亦名拔除一切業障，應如是持。」

時，薄伽梵說是語已，諸菩薩摩訶薩及大聲聞、國王、大臣、婆羅門、居士，天、龍、藥叉、

捷<sup>29</sup>達縛、阿素洛、揭路荼、緊捺<sup>30</sup>洛、莫呼洛伽，  
人、非人等一切大眾，聞佛所說，皆大歡喜，信  
受奉行。

藥師琉璃光如來本願功德經

<sup>29</sup> 麗藏：捷；永樂北藏及龍藏：健

<sup>30</sup> 麗藏：捺；永樂北藏及龍藏：捺

## ● 結誦儀

### 藥師灌頂真言

(三編)

南無薄伽伐帝 鞞殺社嚩嚩 薜瑠璃鉢刺  
婆 喝囉闍也 怛他揭多耶 阿囉訶諦 三藐  
三勃陀耶 怛姪他 唵 鞞殺逝 鞞殺逝 鞞  
殺社 三沒揭諦 莎訶

### 解冤咒

(三編)

解結解結解冤結，解了多生冤和業，洗心滌  
慮發虔誠，今對佛前求解結。藥師佛，藥師佛，  
銷災延壽藥師佛，隨心滿願藥師佛。

### 銷解病咒

(三編)

唵。致哩哆。致哩哆。憚吒唎。娑婆訶。

### 補闕真言

(三編)

南無喝囉怛那。哆囉夜耶。佉囉佉囉。俱住俱

住.摩囉摩囉.虎囉.吽.賀賀.蘇怛拿.吽.潑抹拿.娑  
婆訶.

## 補闕圓滿真言

(三編)

唵.呼嚧呼嚧.社曳穆契.莎訶.

## 普迴向真言

(三編)

唵.娑麼囉.娑麼囉.弭麼曩.薩嚩訶.摩訶斫  
迦囉嚩吽.

## 藥師讚

(一編)

藥師佛延壽王，光臨水月壇場。悲心救苦降  
吉祥，免難銷災障。懺悔眾等三世罪，願祈福壽  
綿長。吉星高照沐恩光，如意保安康。吉星高照  
沐恩光，如意保安康。

## 藥師偈

(一編)

藥師如來瑠璃光 焰網莊嚴無等倫  
無邊行願利有情 各遂所求皆不退



南无护法韦驮尊天菩萨

